

দুর্ঘটনার কবলে উত্তরা ইউনিভার্সিটির বাস, ৩০ শিক্ষার্থী আহত



প্রকাশ : ১০ জুন ২০২৬, ১৮:৪৬

বুধবার (১০ জুন) বিকেলে গাজীপুরের রাজেন্দ্রপুর চৌরাস্তা সংলগ্ন এলাকায় এই দুর্ঘটনা ঘটে। আহতদের মধ্যে ২০ জনকে শ্রীপুরের মাওনায় আলহেরা হাসপাতালসহ বিভিন্ন হাসপাতালে চিকিৎসার জন্য পাঠানো হয়েছে। তাৎক্ষণিকভাবে আহতদের বিস্তারিত পরিচয় পাওয়া যায়নি। পুলিশ জানায়, উত্তরা ইউনিভার্সিটির একটি বাস প্রায় ৪০জন শিক্ষার্থী নিয়ে শ্রীপুরের মাওনা যাচ্ছিল। বিকেল পৌনে ৫টার দিকে বাসটি ঢাকা-ময়মনসিংহ মহাসড়কে গাজীপুর সিটি কর্পোরেশন এলাকার রাজেন্দ্রপুর চৌরাস্তার কাছে নিয়ন্ত্রণ হারিয়ে রাস্তায় কাত হয়ে উল্টে যায়। খবর পেয়ে পুলিশ ঘটনাস্থলে পৌঁছে আশপাশের লোকজনের সহায়তায় আহত শিক্ষার্থীদের উদ্ধার করে শ্রীপুরের মাওনায় আলহেরা হাসপাতালসহ বিভিন্ন হাসপাতালে পাঠানো হয়। আহতদের মধ্যে তিনজনের অবস্থা গুরুতর বলে জানায় পুলিশ। এদিকে দুর্ঘটনার পর ওই মহাসড়কে প্রায় আধাঘণ্টা যান চলাচল বিঘ্নিত হয়।

গাজীপুর সদর থানার ওসি মো. আমিনুল ইসলাম জানান, দুর্ঘটনায় আহত শিক্ষার্থীদের উদ্ধার করে হাসপাতালে পাঠানো হয়েছে। দুর্ঘটনার পর ওই মহাসড়কে প্রায় আধাঘণ্টা যান চলাচল বিঘ্নিত হয়। পুলিশি তৎপরতায় বর্তমানে পরিস্থিতি স্বাভাবিক রয়েছে।

